



**Trotzchöpf**  
CLIQUE LIESCHTEL  
1983



## 20 JOHR - JUBILÄUM

### Sujet 2002: Au mir fyre Geburtsdaag!

D Basler si syt 500 Johr by der Eidgenosseschaft und d Trotzchöpf syt 20 Johr an der Lieschtler Fasnecht.

S Fescht vo Basel – 500 Johr by der Schwyz derby, unter däm Titel hei mir drey Dääg chönne fyre das grosse Jubiläum am Rhy.

Uf der Pfalz, in der Innestadt, uffem Märtplatz und am Rhy unde isch gfyrt worde bis in die frühe Morgestunde und die Glückliche hei sogar immene Beizli äs Plätzli gfunde.

Es riesigs Füürwärg am Samschdigzobe het duusigi uf d Strosse zoge, äs het glüchtet, gchnallt und gfunkt, vo musikalischem Takt begleitet si riesigi Bluemeschtrüss, Stärnebougets und sogar Palme in Nachthimmel gleitet.

Am Sündig denn der hischtorischi Feschstumzug by grosser Hitz, me cha Bruuchtum gseh us der ganze Schwyz.

Eröffnet hei der Zug d Regierige vo de beide Basel und hindedry chöme d Politiker mit grossem Gefasel.

Us jedem Johrhundert gits e paar Episode, sogar der Lieschtler Banntag isch dur d Strosse zoge.

Au d Zünft hei sich nit lo lumpe, me isch derby, winkt uf alli Syte und trinkt ab und zue äs Gläsi Wy.

Glychzytig isch ufem Rhy e grossi Riverparade, ei Schiff nach em andere chunnt vo obenabe, es wird gwunke und d Schiffssirene töne, e Mänge dänkt, an das chönnt ich mi fascht gwöhne.

Der Umzug isch umme, me goht jetz an Rhy und chehrt nonemol in eim vo dene tolle Beizli y.

Syt 500 Johr isch Basel mit de Rampasse by de Eidgenosse, 480 Johr dervo si ohni grossi Wälle verflosse.

Doch syt 20 mol 365 Dääg ischs mit der Rueh verby, syt denn si nämlig d Trotzchöpf als Berycherig by däm Bund derby.

E mängs Sujet hei mir in dene Johre kreiert und eusi Meinig em Volk vor d Nase gführt.

Im erschte Johr si mir als schüüchi Blätzlibajasse umme zoge, „Fyre mer oder fyre mer nit“ hei mir eus s zwöite Johr müesse froge.

Derno het dr Gloon d Zytigsänte vo dr BZ uf d Schippe gnoch, die ville Boustelle z Lieschtel si s Johr druf als Sujet use cho.

Bym Fünfjörige hei mir als Chäschperli jubilliert, s Johr druf als Reschisör d Filmszene im Stedtli pointiert.

Dr Profässer het die dütschi Rächtschrybig verdrüllt, denn hei mir mit em Wassertröpfli der neu Brunne im Stedtli gfüllt.

Der Lieschtler Bruchtumsexport hei mir als Banntägler praktiziert und mit ere Elsässere und emene Waggis an eusem 10-jöhrige brilliert.

D Nuggiwälle isch s Johr druf der neuschti Trend, und derno si mir als Velorennfahrer durs Stedtli grennt.

Bevor mir s Phantom vo der Opere hei angaschiert, het eus s Stinkwasser zum Giftmischer animiert.

Über die Glöön vo der fünfte Rotte deuje mir eus luschtig mache, derno als Stärnegucker der Komet Hale-Bopp agaffe.

Im Johr 1999 isch der Börsegang vo der Swisscom euses Thema, s Johr spöter passt eus die neuji Chinabeiz ins Schema.

Au d Moorhuehnjagd s letscht Johr het eus nit vertrybe, drum chönne mir jetz **20 Johr Trotzchöpf** schrybe.

Nit nur d Basler Eidgenosse und mir Trotzchöpf dörfe fyre, au d Schwieriplatzplanig cha sicher scho mit 40 Johr brilliere.

Eusi Stedtliplanig und d Rothuusstross si scho syt Johrzähnte ä Duurbrenner, do gits no lang kei Jubiläum mit eusne Penner.

Aber am Bahnhof duet sich jetz einiges, äs wird abbroche, gschalt und betoniert, sogar d Schiene wärde no poliert.

Das mues alles sy, will im Juni by eus d schwyzer Turnerinne und Turner deuje jubilliere und bym Bad Buebedorf mit ihre Darbietige wei brilliere.

S Verchehrsinseli an der Burgstross, bym neue Ängel cha kei Jubiläum fyre, dört hei nämlig scho wieder d Boumaschine afo giere. Me het erscht wos fertig gsi isch gmerkt, und das isch nit glooge, dass d Füürwärg Problem hei mitem Umfahre vo däm Boge.

S isch jetz tiefer gsetzt worde, wäge eim Daag im Johr, das chunnt wirklig numme by de Lieschtler vor.

Au d Ängel-Statue dorf allwäg nümme jubiliere, vor zwöi Johr het si doch no chönne der Ygang verziere.

Nümme Feschte und Jubiliere chönne au no zwee anderi Seele, will si leider jetz scho in der Stadtverwaltung fehle!

Ab dem Debakel leuje mir eus aber nid verdriesse, jetz gönge mir ab uf d Gass go d Fasnecht gniesse.

---

**Wie allewyl isch am Fasnechtszischdig d Latärne-Usstellig im Alte Züghuus vom zwöi zmidag bis am nüni zobe!**